

吏曹判書趙士秀雖有清儉之行而執性偏隘政事之間多有
所失至於至親別嫌之處任情注擬無所畏忌請罷荅曰趙士
秀罷職似過遞差可也後累啓依允

史臣曰趙士秀執性偏隘故政事之際未免有徇私自用之弊
以致用人之失臺諫論之宜矣然士秀庸者雖有偏用之失夫
豈受人臧獲貨賂而專除拜之權哉今者公然受苞苴於白日
而不恤人言者亦忝處銓曹之任而臺諫不効而退之唯論士
秀是可謂盡言責乎其畏避循默甚矣

○上御夜對○日微暈兩弭夜異方如火氣

己未以李冀為吏曹判書鄭惟吉為同知中樞府事尹穀中為
吏曹正郎

庚申

上行冬至望闕禮後進禮物于

兩大妃殿仍御勤政

殿受百官賀禮○領議政沈連源左議政尚震右議政尹漑兵
曹判書鄭士龍右贊成李浚慶禮曹判書洪暹詣賓廳啓曰自
上富於春秋學問當及時為之朝講則宰相臺諫皆得入侍故